

Date – 22/05/2025

Time - 18:30 -18:40Hrs

AKASHVANI AIZAWL
REGIONAL NEWS BULLETIN

HEADLINES (EVENING)

1. Aizawl-a TBCC ah ruihhlo ngai hawna tur nei lova khawlaia tei rawlai te a rang thei ang bera enkawl leh turin sorkarin ruahmanna a siam pui.
2. Buichali leh Sairang inkar kawng chhe zual lai hnawh that hna chu naktuk atang khian Contractor ten an thawk tan dawn.
3. Prime Minister Narendra Modia chuan Operation Sindoor hlawhtlinnaah sipaite fakin an huaisenna avangin Pakistan sipaite thingthiin an tlawm a ti.
4. External Affairs Minister Dr.S.Jaishankar-a chuan India leh Pakistan inkara inkahhai neih chu midang inrawlh lova ram pahnihte inbiakna liau liau a ni a ti.

<><><>

SOCIAL WELFARE MINISTER

Aizawl-a Tawngtai Bethel Camping Centre TBCC ah ruihhlo ngai hawna tur nei lova khawlaia tei rawlai te a rang thei ang bera enkawl leh turin sorkarin ruahmanna a siam pui.

Social Welfare Minister Pi Lalrinpuiin vawiin khan TBCC founder Pu Zohmingthanga leh TBCC Advisory Board hotute a kawm a, TBCC tha zawk, langtlang zawk leh inkaihhraina mumal zawk nena kalpui dan tur an sawiho a. TBCC lam pawh hian dan hnuaia mumal taka kal chu an duhdan anih thu leh lawmawm an tih thu an sawi a, heibakah hian Admission mumal zawka tih leh a hmun hmain a zawh tawh damlo la turin an inruahman dawn a. TBCC advisory Board Pu Vanhela Pachuau Chairman-na hnuaiah uluk zawkin an vil tawh dawn bawh tih he hunah hian tarlan a ni..

Social Welfare Minister hian ruihhlo enkawl na centre dang Operation Kingdom Ministry (OKM) hotute a kawm bawh a. Anni hi Phunchawngah inbengbelin ruihhlo ngaite Pathian thu zirtirna an kalpui a, thla 7/8 te an course hi a ni thin, tunah hian mi 400 an awm mek a ni.

Centre 2 hrutute a kawmnaah hian Minister chuan Sorkar in dan angin accreditation a kalpui tawh dawn a chu dan hnuaia minimum standard zawm

tur awmte an zawm theih nan Center te training pek a, kawng hrang hranga puih a tum thu leh Kohhran hrang hrang hruaitute pawh puitu tura sawm an nih thu a sawi a. Anni lam pawhin dan hnuaia inkaihhruaina mumal tak nena kal a ni tur chu an lawm thu leh Sorkar, Kohhran leh NGO te nena thawh tlan chu an duhthusam anih thu an sawi a ni.

<><><>

CM

NITI Aayog Governing Council leh Raising NE: Investors Summit 2025, tel tur leh sawrkar laipui hruaitute dawr turin Chief Minister Pu Lalduhoma chuan vawiin khan New Delhi a pan.

Chief Minister Office atanga thudawn danin Chief Minister hi Commissioner & Secretary to CM Pu Vanlaldina Fanai bakah sawrkar mi pawimawh dang ten an tawiawm a, NITI Aayog Governing Council leh Raising NE: Investors Summit 2025 ah a tel dawn bakah sawrkar laipui hruaitute a dawr dawn a ni.

NITI Aayog hi Union Cabinet in kum 2015 a a din a ni a. Prime Minister chu Chairman niin state leh UTs zawng zawng Chief Minister te chu member an ni. NITI Aayog bultum hian Viksit Bharat 2047 kalpui mek a ni a. Kum 2047 hmaa India ram chu ram changkang a hlankai tumna a ni.

<><><>

TRUCKERS

Mizoram Truck Owners Association leh Mizoram Truck Drivers Association ngenna angin naktuk hian Buichali leh Sairang inkar kawng chhe zual lai hnawh that hna Contractor ten an thawk tan dawn a, Truck khalhtu leh neitute sawi danin kawng chhe zual lai siamthata tlan ngam anih chuan an tlan chhonzawm dawn tih an sawi.

Mizoram Truck Owners Association hotute chuan nimina PWD Minister Pu Vanlalhlana hova Buichali leh Sairang inkara kawng chhe zual lai an enfiahna ah Contractor te chu kawng chhe zual lai thawm that hna thawk turin an ngen a, an ngenna angin Contractor ten thawh an inhuam angin naktuk atang hian an thawk than dawn a, truck neitu leh khalhtute hian naktuk chawhnu dar 2 ah kawng chhe zual lai an thawm that hi an enfiah tur thu leh an duh ang anih chuan an tlan chhonzawm dawn tih an sawi a ni.

MTOA Secretary Pu Dina Tlau chuan Truck neituten chak zawka kawngpui siam a nih theih nan kawng siam chhung, zing dar 9 atanga tlai dar 5 thleng lirthei din tir an inhuam thu an sawi bawk a ni.

Byte... MTOA Secretary Pu Dina Tlau

Nimin khan PWD Minister Pu Vanlalhlana chuan Buichali leh Sairang inkara kawng chhe zual lai an enfiahna ah National Highway 06 chu Mizoram chak lakna kawngpui pawimawh berte zinga mi a nih angin, engtik lai pawha lirthei zawh tlaka siam a tul thu a sawi a, NHIDCL hotute chu mipui, a bikin lirthei hmanga eizawngten harsatna an tawh dante hrilhfiahin, tun aia chak lehzuala kawng siam hna kalpui turin a chah a ni.



STATE MUSEUM

Mizoram state Museum enkawltuten Museum a dah chi hnam rohlu neite chu ti riral mai lovin, mipuite hmuh theih turin Museum a pe zel turin an sawm.

International Museum day puala Akashvani Aizawl, Regional news unit-in a kawmnaah, Mizoram State Museum Curator Pu C. Lalruatfela chuan tun dinhmunah Mizoram State Museum-ah thil chi hrang hrang 789 pho chhuah mek a ni a ti a. Phochhuah tur dah that 3218 a awm mek tih sawiin a vaiin thil dahthat 3950 a awm mek an ti a, Museum a dah chi hnam rohlu neite chuan paih bo emaw ti riral mai lovin Mizo zawng zawngte tana rohlu chhenfakawm, mipuiten an hmuh theih turin mahni inbengvara Mizoram state Museum a dah zel turin a sawm a, zirlaite leh thangthar te tana Museum a dahthat chu intihhmuh zel turin a chah a ni.

Byte: Museum Curator

Pu Ruatfela chuan Museum chu Mizo hnam nun phochhuahna a nih avangin ram pawn atangin a tlawhtu an pung chho mek a ti a, Mizote chuan hnam angin Museum ngaihhlut nachang an hre thin lo tih sawiin tunhma chuan Museum chu thil hlui leh thil mak dahkhawmnaah an ngai thin a, kum engmawti atang khan thangtharte chuan Museum pawimawhna an hre zel a, hnamzia leh nihphung hriat theihna hmunpui ber a ni tih an hre chho a ti a, tunlai thangtharte leh zirlaiten ngaihhlut nachang an hria chu lawmawm a tih thu a sawi. Mizoram State Museum chu hmun lailia taka awm a nih avangin khualzin tlawhtu an ngah a, tlawh tu zingah hnamdang chu a tam pawl an nih thin thu sawiin, research scholar te leh zirlai dangten an zirna kaihhnawihah Museum chu an hmang tangkai hle tih a sawi bawk a ni.

International Museum Day hi kumtin May ni 18 ah hman thin a ni a, kuminah erawh Pathianniah a tlak avangin Mizoramah chuan May ni 16 Zirtawpni khan hman a ni a, International Museum day pual hian a thlawnin mipui tlawh theih turin Museum hawn a ni.



SYNOD

Mizoram Synod chuan UPSC hnuaia exam hrang hranga tlin tumte tanpuina tur, Synod Resource Centre-ah tun thla tawp atanga June thla laihawl thleng enrollment a la dawn a, eng kohhran tan pawh dil theih a ni.

Akashvani Aizawl zawhna chhangin, Sikulpui Headmaster, leh Synod Zirlai Viltu Comtt. Member nilai, Upa Zonunmawia chuan Mizoram Synod hnuaia Zirlai Viltu Committee-in a enkawl, Synod Resource Centre hi kumin atan tun thla tawp atanga June ni 15 vel thleng enrollment lak a ni dawn tih sawiin, SRC-a member ni tur hian Kohhran inthliarna a awm lova, higher secondary zirlai atanga master degree zo tawh thlengin Central Service bakah All India Services exam tum te tan member nih a dil theih a, SRC member inziak tlingte hnenah Incentive pek an ni dawn tih a sawi a ni. Pu Zonunmawia chuan SRC chu coaching centre a ni chiah lo tih sawiin, zirlaite lehkhahu mamawh bakah computer leh internet hman tur te chu a thlawnin an chhawpchhuah sak a, mahni inlama lehkhah zirna hmun nei lote, exam inbuatsaihna tur lehkhahu leina tur nei loten an hmang tangkai hle tih sawiin,

zirlaite chuan nilengin tlai dar 6 vel thleng hun an hmang thin a ti a, kuminah chuan kum dang aia tihmasawnin, zirlaite zirtir leh kawm turin tualchhung leh Mizoram pawn atangin resource person te rawih an ni tawh dawn tih a sawi a ni.

Byte: Pu Zonunmawia

Mizoram Synod chuan kum 2018 Synod inkhawmpui-a “Central Service-ah Mizo an tlin tam theih nan Synod-in hma la rawh se,” tih rawtna bawhzuiin, kum 2021 September ni 20 khan Synod Resource Centre hi a hawng a, tunah hian Synod Conference Centre, Mission Veng-ah a awm mek a ni.

<><><>

R NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

INTNL BIODIVERSITY DAY

Khawvel pum huap International Biological Diversity Day chu vawiin khan hman a ni a,

Mizoram-ah pawh IDB 2025 pualin hmun hrang hrangah hun hman a ni a, a pui ber chu MINECO ATI Auditorium-ah Mizoram State Biodiversity Board leh National Biodiversity Authority (NBA)-ten an buatsaih a. Environment, Forests & Climate Change (EF&CC) Minister Pu Lalthansangan a hmanpui a ni.

Thusawiin Minister chuan ram hmasawnna leh thilnung chi tinrengte humhalhna chu a kal kawp flat tur a ni, a ti a. Nungcha venhim hna chu hmalam hun innghahna pawimawh a nih avanga thawk tur an ni zawk, a ti.

He hun hiPCCF Pu R.K. Tiwari-an a kaihruai a, BMC Member-te, zirlai naupangte leh Environmental NGO- te leh Department hrang hrang atanga sawm bikte an tel a ni.

<><><>

PM

Prime Minister Narendra Modia chuan Operation Sindoor hlawhtlinnaah sipaite fakin an huaisenna avangin Pakistan sipaite thingthiin an tlawm a ti. Pu Modia chuan ramchhunga firfiaka chetna thleng apiangah a sawkhawk Pakistan chuan a tuar zel ang a ti a. Pakistan chuan Indoa nena indonaah hnehna a chang thei ngai lo a hei vang hian firfiakte chu hmanrua atan ahmang thin a ti bawk. Vawiin khan Rajasthan-a Bikaner kiang Palana-a hmasawnna hna thawh cheng vaibelchhe sing 2 sang 6 chuang man a hawnnaah he thu hi sawiin Pu Modia chuan ramin zalenna a neih atangin Pakistan chuan firfiaka chetna a ti hluar char char a ti a. Tunah chuan heng an pawikhawih

avanga tawrhna hi an sipaite leh an ram sum dinhmunin a tuar tawh ang a ti bawk.

Prime Minister Narendra Modia hian kum 11 kalta chhunga ramchhunga hmasawwna ruhrel an siam zawng zawngte a tarlang a. Tunlai changkanna mila kawngpui tha leh rel kawng tha siam turin an thawk tih a sawi a. Ramchhungah Amrit Bharat Station scheme hnuaiah rel station 1300 chuang thawmthat a ni tih a sawi bawk a ni.

<><><>

EAM

External Affairs Minister Dr.S.Jaishankar-a chuan India leh Pakistan inkara inkahhai neih chu midang inrawlh lova ram pahnihte inbiakna liau liau a ni a ti. Netherlands-a news channel pakhatin a kawmnaah Pu Jaishankara chuan he thu hi sawiin US Secretary of State Marco Rubioa'n a rawn biak bakah US Vice President JD Vance chuan Prime Minister Narendra Modia a rawn be ngei a ti a. Mahse ram leh ram innghirngcho kara chanchin ngaihvena inbiak hi chu thil kalphung pangngai anih thu a sawi a. External Affairs Minister chuan India-in US pawh tiamin ramdangte lakah dinna nghet tak a nei a, chu chu Pakistan-in inkahhai a duh anih chuan India sipai lalte an hriattir tur a ni tih chu an dinna a ni a ti a. Tun thla ni 10-a Pakistan chhanlet nana India sipaiten an airbase leh air defence system a kahchhiat hnuah Pakistan sipaite chuan inkahhai ngei a tul tih an hria a ti a. Dr. Jaishankar-a chuan Pahalgam anga firfiaka chetna India in a tawh leh anih chuan na taka chhanlet leh a ni ang a ti bawk.

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 122-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawh ang.

<><><>